

## Veruleg skerðing er í fjárlagafrumvarpi til starfsemi SÁÁ frá því sem er 2022

### Það þýðir verulega minni meðferð við áfengis- og vímuefnafíkn

#### Meðferðir SÁÁ, innan og utan sjúkrahúss, eru gríðarlega mikilvægar og nú í hættu

- **270 færri innlagnir á Sjúkrahúsið Vog**
- **Minnst 160 sjúklingar fá ekki lyfjameðferð í göngudeild við ópíóíðafíkn**
- **Sumarlokanir að nýju (sumarið 2022 voru í göngudeild 2800 komur í 14 mismunandi meðferðarúrræði auk 752 viðtala; og 193 einstaklingar fengu inniliggjandi sálfélagslega meðferð á Vík)**

Meðferðarsvið SÁÁ hefur áður sent inn erindi er varðar beiðni um leiðréttingu á rekstrargrunni samninga um heilbrigðisþjónustu sem meðferðarsvið SÁÁ sinnir. Rekstrargrunnurinn hefur verið um vanfjármagnaður um **300 mkr** og stefnir í að verða **350 mkr.** fyrir árið 2022. Með skerðingu á framlögum árið 2023 stefnir hallinn á rekstri meðferðarsviðs SÁÁ í að verða **450 mkr.** Að óbreyttu getur slíkur halli ekki annað en leitt til umfangsmikillar skerðingar á þjónustu.

SÁÁ hefur gripið til ýmissa aðgerða til að vernda núverandi þjónustu og mæta sívaxandi þjónustubörf fólks með fíknsjúkdóm. Þar má nefna:

**Inniliggjandi meðferð á Sjúkrahúsinu Vog og á meðferðarstöðinni á Vík.** Að afeitrun lokinni er mjög mikilvægt að til sé inniliggjandi meðferðarúrræði fyrir fólk í annars stigs heilbrigðisþjónustu til að ná jafnvægi og bata frá fíknsjúkdómnum. Þetta er ekki síður mikilvægt fyrir fólk sem kemur til meðferðar utan af landi og / eða fyrir fólk sem býr við slæmar félagslegar aðstæður sem þarf næði og öruggt húsaskjól í meðferð. Í núverandi samningum um meðferðarstöðina Vík er ekki greitt fyrir þá sólarhringsþjónustu sem er veitt og er nauðsynlegt, heldur samið um þjónustuna eins og um dagdeild sé að ræða. Sérstaklega var safnað fyrir því að geta haldið meðferðarstöðinni Vík opinni s.l. sumar til að tryggja meðferðarsamfellu allt árið og bættist það við núverandi samningsbundna skekkju.

**Lyfjameðferð við ópíóíðafíkn.** Ópíóíðafíkn hefur aukist mjög síðustu ár og er stækkandi vandi meðal Íslendinga. Gagnreyndar meðferðir skila góðum árangri og er mikilvægt að tryggja að allir Íslendingar sem þurfa slíka meðferð fái hana. Núgildandi samningur um lyfjameðferð við ópíóíðafíkn er takmarkaður við 90 einstaklinga og því er nú nauðsynlegt að bregðast við meðferðarþörfinni sem telur um 250 einstaklinga. Einnig þyrfti að styrkja göngudeildarþjónustu við þennan hóp og eftirfylgni við hann. Mikilvægt er að þróa samstarf við heilsugæslu þegar dregur úr meðferðarþörf til að sinna vel langtíameðferð þessa hóps. Lyfjameðferðin er í dag veitt frá sjúkrahúsinu Vog og hefur þannig samnýtt aðstöðu og starfsfólk. Vegna sívaxandi umfangs hennar er nauðsynlegt að þróa hana sem sérstakt göngudeildarúrræði með sérhæfðu starfsfólki.

**Efling göngudeildarþjónustu SÁÁ** sem fyrsti viðkomustaður í meðferð við fíknsjúkdómum. Með því að efla göngudeild SÁÁ má tryggja gott aðgengi að þjónustu um leið og kostnaði er haldið í skefjum. Nú er boðið upp á sambærilega meðferð og fram fer á Vog á göngudeild fyrir þá sem það hentar, þannig má draga úr biðlista og kostnaði við innlögn. Göngudeild gegnir einnig mikilvægu hlutverki í eftirfylgni og getur stórleg bætt batalíkur og dregið úr endurinnlögnum. Þróa þarf úrræði sem miða að því að mæta betur þörfum einstaklinga eftir fyrsta mánuð í meðferð. Einnig er mikilvægt að hægt sé að sinna fjölbreyttari þjónustu í göngudeild sem stuðlar að betri geðheilsu og heildrænum bakslagsvörnum með fjölbreyttu teymi heilbrigðisstarfsmanna. Auk þess eru góð tengsl við aðra heilbrigðis- og félagsþjónustu er mikilvæg til að tryggja samfellu í þjónustu Tilvísanir í úrræði SÁÁ en einnig vísanir til og frá öðrum úrræðum/þjónustuaðilum í heilbrigðiskerfinu. Á s.l. sumri var meðferðarsamfella tryggð með sérstakri fjáröflun til að tryggja heilsárs opnun göngudeildar, en núgildandi samningar duga ekki til þess.

F.h. SÁÁ

Anna Hildur Guðmundsdóttir  
formaður